

Ekwo

Zekaraya

Onye Mpfuchiru Chileke

Chipfu ekuphuta ndu Ízurelu azu

1 ¹L'ona k'eso; l'apha, kwe onye eze ono, bu Dariyosu ebo l'abu eze ndu Peshiya be Chipfu pfuru opfu yeru onye mpfuchiru ono, bu Zekaraya; mbu nwa Berekaya, bu nwa Ido su: ²Chipfu be ehu ghu-shiru egu ike l'opfu ehu ndiche unu phe. ³Oo ya bu le-a; karu ndu-a su phe-a: Wakwa iphe, oopfu baa; mbu Chipfu, bu Okalibe-Kakota-Ike: Unu lwaphutaazu lwapfuta mu; k'ophu mu a-lwaphutaazu lwapfuta unu. Nokwa iphe, Chipfu, bu Okalibe-Kakota-Ike eepfu. ⁴Unu ta adukwa ge ndiche unu phe, bu ndu ono ndu mpfuchiru ichie pfuru opfu ehu phe su: "Wakwa iphe, oopfu mbu Chipfu, bu Okalibe-Kakota-Ike; unu ghakobe haa ejo uzo ono, unu eshi ono; yee ejo-ememe ono, unu eme ono. Obenu l'ephe ta angabeduru nchi; ophu ephe eyekwarupho onu. Nokwa iphe, Chipfu eepfu bu ono. ⁵?Bu awe be ndiche unu obu no nta-a? To ndu mpfuchiru obu; ?ephe anoje ndzu ojejeje to? ⁶Iphemiphe ono, mu pfuru ono; mekpoo iphe ono, mu toru okpa iya ono, bu iphe, mu karu ndu-ozimu, bu ndu mpfuchiru g'ephe meje ono; ?to nwuchaadaru l'ehu ndiche unu phe? O buru iya bu l'izimanu alwa pheazu; ephe pfua su: 'Chipfu, bu Okalibe-Kakota-Ike meekwarupho anyi iphe, gbaru uzo, anyi eshi; yee iphe, anyi eme; mbu lo meerupho anyi iphe, o tuseru k'ememe.' "

Nwoke, no le mgbaka oshi mituru

⁷O rwua l'ujiku k'ukporo l'eno l'ona k'iri le nanu, bu onwa Shebatu; l'apha, kwe onye eze ono, bu Dariyosu ebo l'abu eze iya; Chipfu bya epfuru yeru onye mpfuchiru ono, bu Zekaraya; mbu nwa Berekaya, bu nwa Ido. ⁸O buru l'enyashi be mu phuru ophulanya huma nwoke, agba l'inya

uswe-uswe! O pfuru le mgbaka oshi mituru, pfugbaaru l'uwuru uwuru. Inya inya ndu ophu pfugbaaru iya l'azu buru ndu adu uswe-uswe; ndu eke mkpumpku; ndu acha ucha. ⁹Mu bya ajia nwoke ono su: "Gube nnajiphu mu; ?bu gunu be iphe-a bugbaa?"

Ojozi-imigwe ono, epfu anu mu nu ono bya eyeeru mu onu su: "Mu e-goshi ngu-a iphe, ephe bugbaa." ¹⁰Tobudu iya bu; nwoke ono, pfuru le mgbaka oshi mituru ono bya eyehaa onu su: "Ndu-a bu ndu Chipfu yeru g'ephe je etsoru mgboko l'ophu jephee." ¹¹Ephe yeeru ojozi-imigwe ke Chipfu ono, bu onye ophu pfuru le mgbaka oshi mituru pho onu su: "Anyi tukoaakwaru mgboko l'ophu jegbae; anyi huma le mgboko l'ophu daru gbee; teme ehu du phe gubala."

¹²Tobudu iya bu; ojozi-imigwe ke Chipfu ono bya epfua su: "Gube Chipfu, bu Okalibe-Kakota-Ike; ?i-no-bekporo i-no-be-agma teme li phuaru Jierusalemu obu-imemini; ephe le mkpukpu, nogbaa le Jiuda, bu ndu i tukoshiwaru ehu-eghu ngu e -shi k'ukporo apha eto l'apha iri-a?"

¹³No iya; Chipfu bya epfua nwopfu, du nwa belebele, bu nwopfu ndu mobu yeru ojozi-imigwe ono, epfu anu mu nu ono. ¹⁴Tobudu iya bu; ojozi-imigwe ono, shi epfu anu mu nu ono su mu: "Raa opfu-a arara: Wakwa iphe, oopfu; mbu Chipfu, bu Okalibe-Kakota-Ike: Mu ekoshikwa okophoo ike l'opfu ehu mkpukpu Jierusalemu yee ubvu Zayonu. ¹⁵Obenu le ndu ehu eghushi mu eghu ike l'opfu ehu phe bu oha ono, bu tusaru ehu ono. Mbu l'ehu shi eghu mu eghu nwanshi nwanshi; ephe bya bya emee; ndibe mu kabaa eje iphe-ehuka. ¹⁶Oo ya bu le-a; wakwa iphe, Chipfu epfu baa: Mu a-wata aphu obu-imemini ozo le Jierusalemu; mbu lee-mechaa kpuphu eze-ulo mu azu l'eka ono. La bya eworu iphe, e gude atu ogologo iphe togbo le Jierusalemu. Nokwa iphe, Chipfu eepfu bu ono.

¹⁷"Rakabakwaa ya ro araka su: Wakwa iphe, oopfu baa; mbu Chipfu, bu Okalibe-Kakota-Ike: Mkpukpu mkpukpu mu a-tuko ekameka; ephe l'eku, a-nodu ezeru phe kojokojo; ozo bu le Chipfu a-du Zayonu obu ozo; lo hotakwapho Jierusalemu ozobaa."

Mpu eno yee ndu okpuzu eno

¹⁸Mu bya apalia enya; mpu eno noduwaa mu l'atatiphu. ¹⁹Mu bya ajia ojozi-imigwe ono, shi epfu anu mu nu ono: "?Bu gunu baa?"

O yeeru mu onu su mu: "O kwa mpu ono bugbaa mpu, bu iya chikaru ndu Jiuda; waa ndu Izurelu waa ndu Jierusalemu."

²⁰No iya; Chipfu bya egoshi mu ndu okpuzu eno. ²¹Mu bya bya ajia su: "?Bu gunu be ndu-a l'abya ememe?"

O yeeru mu onu su mu: "Ndu-a bu phe bu mpu, chikaru ndu Jiuda k'ophu bu lo to duedu onye ophu duru ike gbelia ishi; obenu le ndu okpuzu-a byaru g'ephe meru ndzu-agugu nu phe; chitsushia mpu ndu ohamoha-a, bu ndu paliru mpu phe duaha ndu ali Jiuda k'ophu ephe a-chika phe."

Nwoke, gude iphe, aatùje ogologo iphe

2 ¹Mu bya ejeshia apali ɛnya; o nweru nwoke, p̄furu mu l'atatip̄hu. O b̄uru iphe, aatùje ogologo iphe b̄e o gude l'ɛka. ²Mu j̄ia ya s̄u iya: “?B̄u awe b̄e iije?”

O yeeru mu ɔnu s̄u mu: “Mu ejekwa at̄u Jierúsalem̄u g'a maru g'osa iya ȳe ogologo iya habe.”

³No iya; Ojozi-Imigwe ono, shi ep̄fu an̄u mu n̄u ono t̄ugbushia; Ojozi-Imigwe ozo jep̄fushia ya; ⁴bya as̄u iya: “Keta oso je as̄u nwokor̄oɓya ono l̄e Jierúsalem̄u a-b̄ukwaru mkp̄ukpu, a kp̄u-pheduru igbul̄o mgburugburu; k̄ele ndu e-buru iya n̄u a-pa igwerigwe waa iphe-edobe, a-d̄ukwa iya ph̄o ya. ⁵Wakwa iphe, Chipfu ep̄fu baa: O kwa mb̄edua l'onwomu a-buru ɔku kp̄ua g'igbul̄o n̄o-pee ya mgburugburu; t̄eme mu an̄odu l'ime iya meru akpabiri ye iya.”

Ach̄i-phuta ndu a kp̄uru l̄e ndz̄u az̄u

⁶Wakwa iphe, Chipfu ep̄fu baa: “Unu byan̄u! Unu byan̄u! Unu shikwa l'al̄i ndu isheli gbaf̄u gbalaa; k̄ele mu shi t̄ukaa unu l'ɛkameka ḡe ph̄ere-phere, dzuru uswekete ɛno l'akpaminigwe. Nokwa iphe, Chipfu eep̄fu b̄u ono. ⁷Unu lenu! Unu gbalakwaa gbaru laa Zaȳonu; unub̄e ndu ono, unu l̄e Nwada Bábil̄onu bu ono; ⁸k̄ele-a; wakwa iphe, oop̄fu baa; mb̄u Chipfu, b̄u Ọkalibe-Kak̄ota-Ike: Onye b̄u onye denyiru unu ɛka b̄ukwa akp̄uru ɛnya mu b̄e ɔorwu ɛka. Teke ɔ kwab̄ekpooru mu ùbv̄ù bya ezia mu ḡe mu je etsoo ɔha ono, kwar̄u iphe unu l'ɔkwata ono ɔgu; ⁹b̄e ɔ t̄o d̄udu iphe, e-me ḡe mu ta apali ɛka mu n̄ua ndu ono aph̄u; k'ophu b̄u l̄e ndu shi b̄uru ohu ph̄e a-ghak̄obe kwaa iphe ph̄e l'ɔkwata. Noo teke unu a-maru l'oo Chipfu, b̄u Ọkalibe-Kak̄ota-Ike b̄e ziru mu ḡe mu bya.

¹⁰“T̄ua uzu ɛhu-ùtso; t̄eme ɛhu ats̄okwaa ngu ph̄o ùtso; ḡube nwada Zaȳonu; k̄ele mu abyaakwaa. Mu -bya; mu eburu l'echilab̄o unu! Nokwa iphe, Chipfu eep̄fu b̄u ono. ¹¹Ọha, d̄u igwerigwe b̄e a-t̄ugbabekwa onwo-ph̄e ɛphe l̄e Chipfu m̄e o -rwua mb̄oku ono; ɛphe ab̄uru ndibe mu. Mu e-buru l'echilab̄o unu; k'ophu unu a-maru l'oo Chipfu, b̄u Ọkalibe-Kak̄ota-Ike b̄e ziru mu ḡe mu bya. ¹²Chipfu e-keta Jiuda g'ɔ b̄uru okiphe iya l'al̄i, d̄u ns̄o ono; l'ɔobyakwaa ah̄ota Jierúsalem̄u ozo. ¹³N̄oduekwapho nwa nggujungguji l'ip̄hu Chipfu; unub̄e un̄wu-eliphe l'ophu; k̄ele ɔ kpatsuwaru onwiya l'ɛka ono, o bu ono, b̄u ɛka d̄u ns̄o ono.”

Uwe onye-ishi ndu-uke Chileke

3 ¹T̄obudu iya b̄u; ɔ bya egoshi mu Jioshuwa, b̄u iya b̄u onye-ishi ndu-uke Chileke ɛka ɔ p̄furu l'ip̄hu Ojozi-Imigwe k̄e Chipfu ono; Nsetanu p̄fukwaru iya ph̄o l'ɛkutara; abya edoshi iphe, o meru. ²No iya; Chipfu bya as̄u Nsetanu: “Ḡe Chipfu gb̄okwaaru ngu uja; ḡube Nsetanu! Mb̄u ḡe

Chipfu ono, bu iya hotaru Jierúsalemu gbokwaaru ngu uja! ?Nwoke-a ta abudu ishikonku, a lofutaru l'oku?"

³Teke ono, Jioshuwa pfuru l'iphu Ojozi-imigwe ono bu iphe, o yeru bu uwe, kporu idzu. ⁴Ojozi-imigwe ono su ndu pfuru l'iphu iya: "Unu yefu iya uwe ono, kporu ichikiri ono." O bya asu Jioshuwa: "Lekwa; mu nufakwaru ngu ejo-iphe, i meshiru; nta-a be mu byaru eworu uwe, vu oke aswa yee ngu."

⁵Noo ya; mu su g'ephe woru okpulishi-ekwa, saharu imo kpube iya l'ishi. A bya eworu okpulishi-ekwa, saharu imo woru kpube iya l'ishi; bya eworu uwe yee ya. Ojozi-Imigwe ke Chipfu bya apfu-kube iya.

⁶Ojozi-Imigwe ke Chipfu ono bya aturu Jioshuwa ekemu-a su: ⁷Wakwa iphe, oopfu baa; mbu Chipfu, bu Okalibe-Kakota-Ike: "O -buru l'ini-nodu etso uzo mu; emekwapho iphe, mu suru g'i meje be bu ngu emechaa buru onye-ishi ulo mu; bya aburu iphe, i suru g'e mee l'unuphu ibe mu be ee-meje; teme mu anukwa ngu pho oke g'i yiru le ndu-a, pfuru l'eka-a. ⁸Ngabe nchi; gube onye-ishi ndu-uke, bu Jioshuwa; gu l'ogbo-ekwa ngu phe, bu ndu no-kube ngu nu; mbu ndu emeru ngu ahuma oma: Mu emechakwaa duta onye-ozu mu ono, bu Ekali-oshi ono duru bya. ⁹Humakwa mkpuma, mu togboru l'iphu Jioshuwa! Mkpuma lanu ono moru enya esaa; teme mu abyakwa iya edefua iphe l'eli; o kwa iphe, Chipfu, bu Okalibe-Kakota-Ike eepfu. O buru eswe ujiku lanu be mu ewofu iphe-eji, ndu ali-a mejekporu. ¹⁰O -rwua mboke ono be g'unu ha l'onye l'onye a-nodu ezi nwibe iya g'o bya g'unu nokobe le mkpula vayinu unu yele mkpula oshi figu unu." Nokwa iphe, Chipfu, bu Okalibe-Kakota-Ike eepfu bu ono.

Oroku, a wuru le mkpola-ododo; yee oshi olivu labo ono

4 ¹No iya bu; Ojozi-Imigwe ono, shi epfu anu mu nu ono lwaphuta azu byapfuta mu bya ekuteahaa mu g'onye ekute onye eku mgbenya. ²O ji mu su mu: "?I humaru gunu?"

Mu su iya: "Mu humaru iphe, aapfubeje oroku, e mekotaru le mkpola-ododo; iphe, du iya l'eli buru ochi; oroku dukwapho esaa pfuru iya l'eli; uzo, shigbaaru futa l'oroku ono dukwapho esaa. ³Ozo bu l'o duru oshi olivu labo, pfu-kuberu iya nu; ophuu pfuru lekutara ochi ono; ophuu pfuru iya lekicha." ⁴Mu bya aja Ojozi-imigwe ono, epfu anu mu nu ono su iya: "?Bu gunu be iphe-a bu; nnajiuphu mu?"

⁵Tobudu iya bu; Ojozi-imigwe ono, mu l'iya abo uja ono bya eyeeru mu onu su: "?Ti madu iphe, iphe-a bu?"

Mu su iya: "Nnajiuphu mu; mu ta amakwa iphe o bu."

⁶O buru iya bu l'o su mu: "Wakwa opfu, Chipfu epfu anu Zerubabelu: E tee mekwa iya l'ike; ophu eemekwa iya l'okarieka; o kwa onye e gude eme iya bu Unme mu; nokwa iphe, Chipfu, bu Okalibe-Kakota-Ike eepfu.

??I bụ ɡunu; ɡube oke úbú? L'iphu Zerúbabelu bẹ ii-mechaa buru alì, dọ baswaa. Noo teke ọo-pfube mkpuma mkpochi-ishi iya; laatua uzu sụ: 'Ge Chileke ɡoru onu-oma nụ iya-o! Ge Chileke ɡoru onu-oma nụ iya-o!'

⁸No iya bụ; Opfu Chipfu bya erwukwa mu nchị sụ: ⁹“Zerúbabelu ɡu-deakwaa ẹka iya tua ọkpa eze-ulo Chileke-a; ọ buru iya e-ɡudekwapho ẹka iya kpụ-tsee ya. Noo teke unu a-maru l'oo Chipfu, bụ Okalibe-Kakota-Ike ziru mu ge mu byapfuta unu.

¹⁰“Nta bukwa mboku, iphe, ha nwanshii l'eme; ole ?bu onye elephekwanu iya enya? Ndiphe bẹ ẹhu a-tsokwa utso teke epe a-huma ẹka Zerúbabelu wataru akpu ulo ono.

“A bya lenya esaa pho; enya esaa ono bukwa enya Chipfu, anoduje agba mgboko l'ophu mgburugburu.”

¹¹Mu byakwa ajia Ojozi-Imigwe ono sụ iya: “?Bukwanu ɡunu bẹ oshi olivu labo-a, nogbaa oroku ono ẹka ebo ebo ono bu?” ¹²Mu byakwa ajia ya ozo sụ: “?Bu ɡunu bu ekali-oshi olivu labo-a, nogbaa laguga uji-iphe labo-a, bu ophu e gude mkpola-ododo mee-a; teme o buru ẹka ono bẹ manu shiru asoshihu-a?”

¹³O yeeru mu onu sụ mu: “?Ti madu iphe, iphe-a bu?”

Mu sụ iya: “Nnajiuphu mu; mu ta amakwa iphe o bu.”

¹⁴No iya; o sụ mu: “Ndu ono bu umadzu ebo ono, a wuru manu l'ishi; gepe jeeru onye nwe mgboko l'ophu ozi.”

Ekwo, epe ephepe

5 ¹Mu byakwa elee enya ozo; ekwo-aphuphu, epe ephepe noduwaa mu l'iphu! ²Ojozi-imigwe ono sụ mu: “?Bu ɡunu bẹ i humaru?”

Mu yeeru iya onu sụ: “Mu humakwaru ekwo-aphuphu, epe ephepe; o du ukporo nkwo-eka l'ogologo bya adu nkwo-eka iri losa.”

³O bya asu mu: “O kwa onu, aatu mgboko mgburugburu bu onoya. Kele o dua g'iphe o pfuru l'eka lanu ono; su le ndu bu iphuru g'ephe ha be ee-me g'ephe chihu; teme o dukwapho g'iphe, o pfuru l'eka iya ophu sụ; l'iphe, bukpuo ndu akpapyabeje iphe, epe meru ria nte be ee-me g'ephe chihu. ⁴Chipfu, bu Okalibe-Kakota-Ike epfukwa sụ: Mu a-tu ndu iphuru ono onu; tukokwapho ndu ono, akpapyabeje iphe, epe meru gude epha mu ga enwa ono onu kwapho. Otu-onu mu ono abaa l'ibe phe mebyishia ya; mekpoo oshi, e keru ulo iya; me mkpuma, e gude kpua ya.”

Nwanyi, no le nkata

⁵No iya; Ojozi-Imigwe ono, epfu anu mu nu ono bya akpitaru bya asu mu: “Palia enya humakpodapho iphe-a, abya afuta nta-a.”

⁶Mu jia ya sụ iya: “?Bu ɡunu bu ono?”

O yeeru mu onu sụ mu: “O kwa nkata, eegudeje atu iphe.” O sukwapho: “Owaa bu ejo-iphe, ndu ali-a gbaa mgburugburu mekotaru.”

7A bya ekpulia igbidigbi opfu nkata ono; nwanyị nọduwaa anọo l'ime nkata ono.

8Ojozi-Imigwe ono sụ mu: “Ọ kwa ejo-iphe baa.” Ọ bya enwuphu iya azụ l'ime nkata ono; bya eworu igbidigbi opfu nkata ono kpuchiphu azụ ọzo. 9Mu bya apalia ẹn्या; ụnwanyi dụwaa ẹbo p̄furu mu l'iphu. Ẹphe nọdu ẹphe ẹp̄p̄p̄. Nkù p̄h̄e d̄p̄p̄h̄o ẹ ̄nkù ọku-eswi-uda. Ẹphe bya agụ-lia nkata ono parụ paghaa alị ȳe igwe l'ophu parwua mgbaka alị ȳe igwe.

10Mu jia Ojozi-Imigwe ono, epfu anụ mu nụ ono sụ iya: “?Bụ awe b̄ ẹphe pahunu nkata ọbu eje?”

11O yeeru mu ọnu sụ mu: “Ẹphe pa iya eje alị Shina. Ẹphe eje iya akp̄u ru ụlo l'ẹka ono. A -kpughēe ya pho l'e woru nkata ono s̄b̄e l'ọnodu iya.”

Ugbo-inya ẹno

6 1Mu byakwa apalia ẹn्या ọzo; ugbo-inya ẹno nọduwaa mu l'iphu. Ẹphe shi l̄e mgbaka úbvú labo awufuta. Úbvú ono bụ úbvú onyiru-bvu. 2Inya, akpugbaa ugbo-inya k̄e mbụ dukota uswe-uswe. Ndu ophu akp̄u k'ẹbo nọdu ejikota uji. 3Ndu ophu akp̄u k'eto nọdu acha ucha; ndu akp̄u k'eno dukota ukara ukara. G'ẹphe ha dukota okpehu. 4Mu bya ajia Ojozi-Imigwe ono, epfu anụ mu nụ ono sụ iya: “?Bụ gunu b̄e iphe-a bụ; Nnajiuphu mu?”

5Ojozi-Imigwe ono bya eyeeru mu ọnu sụ mu: “Ndu-a bụ ndu e-je l̄e ph̄ereph̄ere l̄e mgbureku ẹno, nọ l'akpaminigwe. Ọle ẹphe e-vuru ụzo goshiadaa onwoph̄e l'iphu onye nwe mgboko l'ophu. 6Ugbo ophu bụ inya oji akpugbaa ya; w̄uru eje ala l'uzo isheli. Ndu ophu inya akp̄u iya nụ achagbaa ucha nọdu awụ etso iya etsotso. Ndu ophu bụ inya, dugbaa ukara ukara kpugbaa p̄h̄e nọdu ejepfu oha, bugbaa l'uzo ndohali.”

7O be teke inya ono wufutaru; ọ nọdu anma p̄h̄e anmanma l̄ehu g'ẹphe wufu je etsoru eliphe l'ophu agbaphe. No iya; ọ sụ: “Unu je; je aghaphee eliphe l'ophu.” Ẹphe w̄uru tugbua je awata aghaphe l'eliphe l'ophu. 8Ọ bya araku mu sụ mu: “Lekwa; ndu ophu eje ala l'oha isheli meakwaru; unme bvuru mu ebvuru l'alị oha isheli.”

Okpu-eze k̄e Jioshuwa

9Opfu Chipfu rwua mu nchị sụ: 10“Ndu-a b̄e ịi-nata mkp̄ola-ochaa ȳe mkp̄ola-ododo; H̄eludayi; waa Tobayijia ȳe Jiedaya, bụ ndu shi l̄e Babilonu lwa, bụ ẹka e shi kp̄ua p̄h̄e l̄e ndzụ laa. Ujiku lanu ono b̄e ii-jekwapho ibe Jiosaya nwa Zefanaya. 11Mkp̄ola-ochaa ono ȳele mkp̄ola-ododo ono b̄e ii-gude w̄ua okpu-eze. Okpu-eze ono bụ onye ii-je ekpube iya l'ishi bụ onye-ishi ndu-uke ono, bụ Jioshuwa, bụ nwa Jiehozadaku. 12Sụ iya l'owa-kwa iphe, Chipfu, bụ Okalibe-Kakota-Ike eepfu: ‘Lekwa; nwoke ono, ẹpha iya bụ Ẹkali-Oshi ọbu l'a-nyikatakwa l'ọnodu iya bya akpukwaa eze-ulo

Chipfu. ¹³Ọ kwa iya a-buru onye a-kpụ eze-ulo Chipfu. Ozo bu l'ee-me iya l'oo-du akpabiri; l'ọ buru eze; nọdu l'aba-eze iya. Teme l'ọ dokubekwapho onye uke l'aba-eze iya ono. Nchị aduẹpho ephenebo doo l'iphe, ephe eme.' ¹⁴Okpu-eze ono be ee-dobe l'eze-ulo Chipfu g'ọ buru iphe, ee-gudeje nyata Hẹludayi; yele Tobayijia; yele Jiedaya; yele Henu, bu nwa Zefanaya."

¹⁵"Ndu bu l'eka du ọnya abya eyeta eka g'a kpua eze-ulo Chipfu. Noo teke unu a-maru l'oo Chipfu, bu Okalibe-Kakota-Ike be ziru mu ge mu bya. Iphemiphe ono e-mekota me unu -nodu emeje iphe, Chipfu, bu Chileke unu epfu."

Ikpe, pfuru oto; yee aphu obu-imemini; o to budu aswi egu

7 ¹Tobudu iya bu; o be l'apha, kwe eze, bu Dariyosu apha eno l'aba-eze iya; le g'onwa ke tete du l'abali eno, bu iya bu onwa Kisulevu; Opfu Chipfu rwua Zekaraya nchi. ²Le ndu Betelu ziwaru Shareza yee Regemu-Meleku; ephe chita ndu ephe l'ephe swi g'ephe je pfuru nu Chipfu; ³waa g'ephe jia ndu-uke ulo Chipfu, bu Okalibe-Kakota-Ike; ephe le ndu mpfuchiru Chileke su phe: "Mu gwaro aphu swia egu lonwa ise ge mu shi eshi k'apha olemole meta-a to?"

⁴Tobudu iya bu; opfu ke Chipfu, bu Okalibe-Kakota-Ike bya erwua mu nchi su mu: ⁵"Jia iphe, bukpo ndu ali-a l'ophu me ndu bu uke su phe: Teke ono, unu swiru egu noo l'aphu l'iphe, bukpo onwa ise yee onwa esaa; e -shi k'ukporo apha eto l'apha iri, nwuwuru nu ?bu mu-a gedegede be unu swi-doru egu ono? ⁶To teke ono, unu shi eri iphe, eeri eriri; angu iphe, aangu angungu; ?to budu unu shi eri eriri angu angungu k'ehu unu ehununu? ⁷Iphe-a; ?to budu opfu, Chipfu gbẹ lonu ndu mpfuchiru ndiche pfua teke ono, Jierusalemu ephe le mkpukpu no-pheru iya mgburugburu dakporupho gbẹ; teme eku nodu abyaru phe pukapuka; teme ndu bu l'echiegu ndohali ephe le ndu bu l'ali okpa ubvu, no l'uzo enyanwu-ariba bukporupho g'ephe bu?"

⁸Teme Opfu Chipfu bya erwua Zekaraya nchi ozo su: ⁹Wakwa iphe, oopfu baa; mbu Chipfu, bu Okalibe-Kakota-Ike: Unu kpeje ikpe, bu irelanu. Unu mejeru nwibe unu iphe-oma; unu aphujeru phe obu-imemini. ¹⁰Unu te emekpajekwa ndu ji phe anoedu ehununu; ozoo ndu enwedunna; ozoo ndu byaru abyabya; ozoo ndu akpa nri. Ophu o dukwa g'unu ha onye arije lime okpoma iya k'eme nwune iya ejo-iphe.

¹¹"Obenu l'ephe jikaru angabe nchi; ephe gude ejo okpoma kwe-fu ike; bya eworu nchi phe swo-chishia g'ephe ta anuma iya. ¹²Mbu-a; ephe woru okpoma phe kpoo gbengu ge mkpuma-egbe; jika l'ephe taa ngabedu nchi lekemu; ophu ephe angabedu nchi l'opfu Chipfu, bu Okalibe-Kakota-Ike pfuru nu phe; mbu ozi, o gude Unme nkiya gbẹ lonu ndu mpfuchiru ndiche pfuaru phe. O buru iya meru g'ọ gude ehununu wata egu Chipfu, bu Okalibe-Kakota-Ike egu shii. ¹³Teke mu kuru oku be ephe ta

angabèduru nchi; noo g'o gude ephe kujekwanu; ophu mu angaduru nchi; nokwa iphe, Chipfu, bu Okalibe-Kakota-ike epfu. ¹⁴Mu wonuru phe chi-kaa; mbu gude oke pherephere zikaa phe; ephe dzuru ohamoha; ephe je ebugbaaru l'ali eka ephe amadu. O buru iya bu l'ali ono, ephe gwoberu ono aburu ochobu; k'ophu bu l'o to duedu onye eshije iya afuta; ophu o dudu onye ejeje iya nu. Ephe woru eguru ali ono togbo o buru ochobu.”

Ukwe onu-oma Chipfu ekwe Jierusalemu

8 ¹Ozokwa; Opfu Chipfu, bu Okalibe-Kakota-Ike rwukwaa mu nchi ozo su: ²Wakwa iphe, Chipfu, bu Okalibe-Kakota-Ike eepfu baa: “Mu ekokwa okophoo ehu Zayonu shii; mbu l'okophoo ehu iya enwukwa mu phuruphuru l'ehu.” ³Wakwa iphe, Chipfu epfu baa: “Mu a-lwaphutakwa azu le Zayonu je eburu eburu le Jierusalemu. Noo teke aa-wata eku Jierusalemu ‘mkpukpu ire-lanu’; l'awata eku ubvu ke Chipfu, ‘ubvu, du nsu’ mbu ubvu ke Chipfu ono, bu Okalibe-Kakota-Ike ono.” ⁴Wakwa iphe, Chipfu, bu Okalibe-Kakota-Ike eepfu baa: “Unwoke, kahuru akahu; yee unwanyi, kahuru akahu e-mechakwaa anoduje l'oma gbororo Jierusalemu ozobaa; onyenonu l'o tsua mgboro l'eka; kele o buwaa ogerenya. ⁵Unwumgboko me unwokoro eji oma gbororo mkpukpu ono ebvu ebvu.”

⁶Wakwa iphe, Chipfu, bu Okalibe-Kakota-Ike eepfu baa: “Oo-dukwaro nwa ndu eka-a, bu ndu ophu phoduru nu biribiri teke ono; obenu ?oo-du-hunu mbèdua biribiri?” Nokwa iphe, Chipfu, bu Okalibe-Kakota-Ike eepfu bu ono. ⁷Wakwa iphe, Chipfu, bu Okalibe-Kakota-Ike eepfu: “Mu a-dzota ndibe mu l'eka oha, bu l'uzo enyanwu-awawa yeke eka ndu ophu bu l'uzo enyanwu-ariba. ⁸Mu e-duphuta phe azu g'ephe bya eburu le Jierusalemu. Ephe a-buru ndibe mu; mu abukwanuru phe onye ire-lanu; pfuberu phe eka oto; buru Chileke phe.”

⁹Wakwa iphe, Chipfu, bu Okalibe-Kakota-Ike eepfu: “Unube ndu anu opfu-a nta, bu opfu, ephe pfuru; mbu ndu mpfuchiru, no l'eka ono teke a turu okpa ulo-a; mbu okpa ulo Chipfu, bu Okalibe-Kakota-Ike-a; g'eka shihukwa unu ike k'ophu aa-kpu eze ulo ono kpu-ghee. ¹⁰Teke eteke atudu okpa ulo ono be e te shidu apfuje amadu ugwo-ozu; ophu aapfudu iya anu-egbudu. Ophu o dudu onye shi ejeje ozi iya le ntusarehu; l'eka onyemonye atsü ohogu iya ebvu; kele mu meru; onyemonye buru ohogu nwibe iya. ¹¹Obenu le nta-a be mu tee meedu nwa ndu phoduru nu le ndu-a ge mu meru teke ndiche ono.” Nokwa iphe, Chipfu, bu Okalibe-Kakota-Ike eepfu. ¹²“Mebyi-iphe, a kuru l'ali a-nodu eme ree; vayinu ami mebyi iya ree; ali amia mebyi iphe, e meberu iya; igwe akwa iji iya. Iphemiphe ono be mu a-nu go buru okiphe, nwa ndu ono phoduru nu ono e-keta. ¹³O kwa egube ono, ohamoha shi gude unube ndu onu-ulo Jiuda yee Izurelu ephu l'iphu ono; bukwaphe ge mu a-dzo unu; l'a gotaahaa unu l'opho. Unu ba atsukwa ebvu; oo ekwaphe g'eka shihu unu ike.”

¹⁴Wakwa iphe, Chipfu, bu Ọkalibe-Kakọta-Ike eepfu: “Ọ kwa egube ono, mu riwaru l'eme unu ẹjo-iphe; mu taa phuduru unu obu-imemini; teke ono, ndiche unu phe kpatsuru mu iwe ono; ọ kwa Chipfu, bu Ọkalibe-Kakọta-Ike eepfu; ¹⁵bukwapho ge mu riwaru iya nta-a le mu emeru ndu Jierusalemu yee onu-ulo Jiuda ree ozo. Unu ta atsukwa ebvu. ¹⁶Wakwa iphe, unu a-nodu eme baa; unu pfujeru nwibe unu ire-lanu; unu ekpeje ikpe, bu ire-lanu bya aburu ikpe, e-me ge nchi du doo l'ime ulo-ikpe unu. ¹⁷Unu ta achijekwaru nwibe unu ẹjo idzu l'ime obu unu; ophu ohejekwa unu ih ee akpapyabe iphe, unu meru ga enwa. Iphemiphe ono bu iphe, dukota mu ashi. Nokwa iphe, Chipfu eepfu.”

¹⁸Mu byakwa anuma Opfu Chipfu, bu Ọkalibe-Kakọta-Ike ozobakwa. ¹⁹Wakwa iphe, Chipfu, bu Ọkalibe-Kakọta-Ike eepfu: “Aswi ẹgu l'onwa k'eno me k'ise me k'esaa me k'iri a-tuko buru teke ẹhu a-tsoje unube ndu onu-ulo Jiuda utso; unu etee eswa; l'o buru unu Ọbo-iphe ẹhu-utso. Oo ya bu le-a; unu yee ire-lanu obu; unu eyee nchi-adu-doo obu!”

²⁰Wakwa iphe, Chipfu, bu Ọkalibe-Kakọta-Ike eepfu: “Ndu du igwerigwe a-bya; mbu ndu shigbaa le mkpukpu, du igwerigwe; ²¹ndu shi le mkpukpu lanu a-wuru je le mkpukpu ozo je asu: ‘G'anyi je je epfua g'anyi tuba Chipfu l'enya; mbu-a g'anyi je achoo Chipfu, bu Ọkalibe-Kakọta-Ike; le mbedia l'e-jejukwaa.’ ²²Ikpoto nemadzu; mekpoo ndu bu oha, ike du l'a-bya achoo Chipfu, bu Ọkalibe-Kakọta-Ike le Jierusalemu; byakwapho gephe rwo ya gephe tuba iya l'enya.” ²³Wakwa iphe, Chipfu, bu Ọkalibe-Kakọta-Ike eepfu: “E -mechaa be umadzu iri, epfugbaa opfu-ali, du iche iche; bya eshigbaa l'ohamoha; l'a-tuje onye Jiuda lanu swiswia l'onu uwe iya arwo iya su iya: ‘G'anyi tsonuru ngu laa; l'anyi numawaru le Chikeleke swiru unu eswiru.’”

Ikpe, ee-kpe ndu ohogu Izurelu

9 ¹Qwaa bu ozi, Chipfu ziru zidoru ndu ali Haduraku; teme o gbu-pyabewaa mkpukpu Damasukosu; kele enya ndiphe; mekpoo enya okpa-ipfu l'okpa-ipfu Izurelu l'ophu bukota le Chipfu be o nowaa. ²Oopfukwapho iphe, oo-me mkpukpu Hamatu, bu ndu ephe l'ephe maru oke; mekwapho mkpukpu Taya yee mkpukpu Sayidonu; mbukpokwaa ephebe-dua ono, maru iphe ntumatu ono. ³Ndu Taya kpwakwaru mkpukpu phe kpushia ya ike. Mkpola-ochaa be ephe kpawaru kube g'onye kpokoberu urwuku; bya akube mkpola-ododo g'onye kuberu ozu l'aguga gbororo. ⁴Obenu le Nnajiuphu a-nafu phe iphe, bu nkephe; bya enwuru ẹku phe ye leze-enyimu. Oku etsua mkpukpu Taya ono tsufu.

⁵Ndu mkpukpu Ashikelonu a-huma iya; ndzu erwuta phe; ndu mkpukpu Gaza ahuma iya terwuhu le ndzu-agugu. Nokwapho g'oo-du ndu Ekuronu; kele iphe, ephe shi ele enya iya a-la pyete. Ndu Gaza be onye eze phe a-la l'iswi; l'a gbakahu le Ashikelonu.

6 Ọ buru ndu alì ọzo e-buchi mkpụkpu Ashịdodu; mu emee g'eku-onwonye ndu Filisitayinu buru bugemu. 7Mee-iphe ono, ẹphe anguje ono bẹ mu a-nafu phẹ; mu anyashia phẹ nri ono, e merwuru emerwu ono, nyakaaru phẹ l'eze ono; nwa ndu ọphu phoduru nu lẹ ndu ono; anodu-doru Chileke anyi; buru ndu a-duwaa g'ipfu ẹka phẹ l'alì Jiuda; ndu Ẹkuronu abyakporo adu gẹ ndu Jiebusu. 8Obenu lẹ ndibe mu bẹ mu a-nodu adzoje l'ẹkà ndu ojogu, azo garugaramu agha ono; ọphu ndu ewere abyadu agbabaa ndibe mu ophorokpo; kele nta-a bẹ mu gudewaa ẹnya mu huma g'ẹphe ejebe iphe-ẹhuka.

Abyabya eze ndu Zayonu

- 9 Gube nwada Zayonu;
 tekwa ẹswa teshia
 ya ike!
 Gwa ebvu ẹhu-utso;
 gube nwada Jierusalẹmu!
 Lekwa; onye buru ngu
 eze abyapfutaakwa ngu.
 Ọ bu onye pfuberekoto;
 teme ọ nodu adzoje
 nemadzu.
 O wozetaru onwiya alì;
 nodu l'eli
 nkafu-igara agba
 abya;
 mbu l'eli nwa nkafu-igara
 obu.
- 10 Ndu Ifuremu bẹ mu a-nafu
 ugbo-inya-ogu phẹ;
 mu anafukwapho ndu
 Jierusalẹmu inya,
 aagbaje alwu ogu.
 La gbajia uta, e gude eje ogu.
 Lọ raa ya arara su gẹhu
 dukwa ohamoha guu.
 Abu eze nkiya e -shi
 l'eze-enyimu owa dasweru
 eze-enyimu ozo.
 Lo shikwapho l'enyimu
 Yufurėtisu no jasụ
 l'eka igwe beru alì beru.

**Ee-dophu ndibe Chileke azu
l'onodu phe**

- 11 “A -bya le gubedua;
mu e-gude ke mee ono,
mu le ngu gude gbaa
ndzu ono haa ndibe ngu,
no le mkporo l'ime iduma,
mini adudu ono;
mee phe;
ephe enweru onwophe.
- 12 Unu laphu azu l'eka ono,
unu kpushiru ike ono;
unube ndu mkporo ono,
enya du l'uzo ono!
Mbụ le nta-a be mu arakwa
iya arara
le mu a-nu unu iphe,
ha g'iphe, unu shi
nwehawaru ugbo ebo;
- 13 kele mu e-woru ndu Jiuda
kwee g'onye kweru uta;
mu eworu ndu Ifuremu
mee g'o buru apfu,
e gude agba uta obu.
Mu a-kpatsu ndibe gube
Zayonu g'ephe dapfu
ndibe gube Gurisu.
Mu emee ngu g'i du
g'ogu-echi,
onye du ike l'ogu pa.”
- 14 Noo teke Chipfu a-byapyabe
phe.
Apfu iya eziahaa phaaphaa
g'ebemu-igwe.
Nnajiuphu, bu Chipfu abya
eworu opu-ogu gbua.
O buru oke pherephere,
shi ndohali be oo-gude
eje.
- 15 O buru Chipfu,
bu Okalibe-Kakota-Ike

e-gbobuta phe.

Ephe a-nodu atsụ ndu ohogu
phe otsu-epfu;
alwụ phe alwụ-kpe
phe.

Ọ buru iphe, ephe e-gude
eme iya bụ mkpuma
rọbo agbagba phe.

Ephe a-ngụ iphe,
aangu angungu;
aba gę ndu mee atsụ.

Ephe ejije pyimu g'ochi,
eegudeje ephe mee
l'aguga oru-ngweja
Chileke.

¹⁶ Ọ buru Chipfu, bụ Chileke
phe a-nodu adzọ phe
m'o -rwua mbọku ono;
eshinu ephe dụ
g'iphe-edobe iya bya
aburu ndibe iya.

Ephe a-gbaje kpingu l'alị
iya g'igopoto,
nọ l'eli okpu-eze.

¹⁷ Lewarọ! Ọ dụnukaru ree
teme ọ manuka mma.

Ereshi l'a-nodu eme
g'unwokokorobyia phe
buru ndu nweru iphe
shii;
mee-ophuu emekwapho
g'unwada phe nwujaa
onu-ochi.

Chipfu e-leta Jiuda enya

10 ¹Unu pfiaru Chipfu g'o dzeeru unu mini teke oodzeje mini ishi-apha. Ọ kwa Chipfu emeje g'igwe rwua erwurwu. Ọ buru iya ayojeru unwu-eliphe mini; teme ọ nodu emeje g'iphe-akuku wata aso pulapula legu; ²kele obvu agwota atukwa atụ-kporoko; ndu agba eja nodu aphụ ophulenyia, abudu eviia; ephe ezeje nrwo, bụ uka; teme ọ buru mkpokoro obu be ephe a-noduje adu. Ọ buru iphe ono meru g'o gude ndu-a nodu anoduje awu-phe g'ikpoto aturu, enwedu onye eche phe nu.

³ Ehu-eghu mu enwukwa phuruphuru l'opfu ehu ndu eche aturu ono; mu jekwa l'anu ndu-ishi ono aphu; kele Chipfu, bu Okalibe-Kakota-Ike eche-a aturu iya, bu iya bu onu-ulo Jiuda. Oo-me phe g'ephe du g'inya, du akpabiri l'eka e gude iya alwu ogu. ⁴ O bukwa le Jiuda be mkpuma, gude ulo e-shi futu; o buru iya be nggu, gude ulo-ekwa e-shikwapho; o buru iya be uta, e gude alwu ogu e-shikwapho; o buru iya be iphe, bukpo ndu a-buru ishi e-shi l'eka. ⁵ Ephe a-tugba nanu; dupho ge ndu bu ojogu, ike du; ephe azo ndu ohogu phe tolitoli le gbororo l'eka aalwu ogu. Eshinu Chipfu no swiru phe eswiru be ephe a-lwu ogu chikaa ndu gude inya alwu ogu.

⁶ Mu e-me g'onu-ulo Jiuda shihu
ike;

mu adzo onu-ulo Jiosefu.

Mu e-me g'ephe laphu azu

lonodu phe;

kele mu a-phuru phe

obu-imemini.

Ephe e-mechaa du ge ndu mu

eshidu jika ajika;

kele oo mbedua bu Chipfu

bya aburu Chileke phe;

mu je l'azaje phe enu.

⁷ Ndu Ifuremu e-mechaa du ge

ndu ike du l'ogu;

ehu e-mechaa tsahaa phe

g'onye nguru mee.

Unwu phe ahuma iya tee

eswa;

obu atsoahaa phe rikpotoo

l'eka Chipfu.

⁸ "Mu a-gbaru phe ola gude

chibata phe;

noo kele mu gbafutaru

phe;

ephe abya adu igwerigwe

g'ephe shi duhawaa.

⁹ A makwaru-a le mu chiru

phe ghakaa l'echilabo

ndiphe;

ole ephe e-shichaa l'eka du

enya nyata mu.

Ephebedua ephe l'unwegirima

phe a-wafu;
ozo bu l'ephe a-lwa.

10 Mu e-je le Ijiputu je achilata
phe.

Mu eje Asiriya je atutukobe
phe.

Mu a-chiru phe bya l'ali
Giladu yele ubvu ubvu
Lebanonu;
ophu uzo a-sukpoda phe
nu anono.

11 Ephe a-ghata eze-nyimu
iphe-ehuka ono;
ole otu-kpereree mini ono
be aa-byanyi;
teme ogbu-mini nyimu
Nayilu l'ophu
atahukota gbengu.

Eku-onwonye ndu Asiriya
aburu iphe, e wozeru
ali; teme ike ono,
shi du ndu Ijiputu
ono aburu phuchamu.

12 Mu e-me; ike adu ndu Jiuda;
teme o buru ephe mu be
ephe e-gude buru.”

Nokwa iphe, Chipfu eepfu.

11 ¹ Unube ubvu ubvu
Lebanonu; unu gubhashia
uzo unu ghebegbaa onu
k'ophu oku e-tsupyashi
oshi sida unu!

² Unu kwaa ekwa unube oshi
payinu;
kele oshi sida daakwaru.

Oshi ono, shi bugbaaru
oshi,
kpuru akpaa ono
be bukotaakwa
ola-l'iswi.

Unu chia mkpu ekwa unube
achi achi,

noḡbaa lẹ Beshanu;
kele eze oṣwa eze
oṣwa be
a sushichaakwaru.

³ Unu ngabekpodapho nchi lẹ
mkpu,
ndu eche aturu akpo;
kele irwu-ṣwa ono,
ephe echeje aturu
ono be e mebyishiwari.
Unu numakpodapho ekiri,
oduma asu;
kele oke-egbudu,
no l'aguga enyimu
Jiḡdanu ono ghewaru
onu.

Ndu eche aturu umadzu ebo

⁴ Wakwa iphe, Chipfu, bu Chileke mu epfu: “Watanu eche aturu ono, e doberu k'egbugbu ono. ⁵ Ndu abyaje azua phe nu azuje phe gbua egbugbu; o to dudu iphe, eeme phe. Ndu erekwanu phe nu nodu asuje: ‘G'ajaja bukwaru ke Chipfu kele anyi nweakwaru eku.’ Ophu ndu eche phe nu aphujeduru phe obu-imemini. ⁶ Oo ya bu le mu ta aphueduru ndu ali-a obu-imemini ozo. Nokwa iphe, Chipfu eepfu. Mu e-woru onyemonye ye nwibe iya l'eka; yele eka onye eze iya. Epe e-gwe ndu ali-a arakabya; ophu mu adzotadu phe l'eka phe.”

⁷ No iya; ndu ono, azuje aturu ono bya ere iya erere ono bya ebuta mu; mu byanu awata eche aturu ono, e doberu k'egbugbu ono. Mu chita oshi-mpaleka labo chiru. Mu gube nanu “n-yemobu”; bya agua ophu “atugba nanu”. No iya mu cheahaa ikpoto aturu obu. ⁸ Lime onwa ophu be mu gude chikashia umadzu eto eche aturu ono. Ikpoto aturu ono kpoo mu ashi; teme echeche phe lakwaa mu pho enyiru. ⁹ Mu pfuaha sū: “Mu tee cheekwa unu. G'onye ala maa larwukwaa agala; onye ala l'iswi alaa ola-gwoo. Ge ndu ophu phoduru nu rije anu nwibe phe.” ¹⁰ Mu bya ewolita oshi-mpaleka mu ono ophu aza “n-yemobu” bya eworu iya nyajia; bya emebyia ogbandzu, mu le ndiphe l'ophu gbaru. ¹¹ O buru l'eswe mboku ono be e mebyiru iya. Ndu ono, azuje aturu ono bya ere iya erere, bu ndu ophu elekpoe mu pho enya teke ono maerupho l'oo Chipfu gude iphe ono, mu meru ono epfu opfu. ¹² Mu su phe: “O -buru l'o du unu ree; unu pfua mu ugwo mu; teke o to dudu; unu ahakpokworo.” Epe pfua mu ukporo mkpola-ochaa le mkpola-ochaa iri.

¹³ No iya; Chipfu su mu: “Woru iya je aturu okpu-ite; mbu ikpoto okpoga ono, epe gude zubua aswa ishi mu ono.” Mu byanu bya achiru

ùkpòro mkpòla-òchaa lẹ mkpòla-òchaa iri ono je awùshi l'eze-ùlo Chipfu; mbù mu woru iya t̀aru òkpù-ite. ¹⁴Mu byakwa bya agbajia oshi mkpa-lẹka mu k'ẹbo, b̀ ọp̄hu aza “atùgba nanù”; shi nno mebyia ab̀ nwune, Jiuda yẹe Ízùrẹlu b̀.

¹⁵No iya; Chipfu s̀ mu: “Ngwa kwaa onwongu ngwa onye-eswe, eche at̀uru, b̀ onye ad̀du iphe, ọ b̀; ¹⁶kẹle mu a-k̀-*lita* onye eche at̀uru l'alì ndu-a, b̀ onye ata akpadu ishi at̀uru ono ndu ọp̄hu ala l'iswi; ọp̄hu oochedu ndu ọp̄hu eme kweekwee; ọp̄hu oomedu ndu mekar̀ iphe ọbvu g'ẹp̄he wekorohu; ọp̄hu ọonudu ndu ọp̄hu ẹhu d̀ ike nri. Ọchia iphe, ọ-*no*du eme b̀ l'ọ-*no*du ata aǹ iya kẹ ndu ọp̄hu ẹhu d̀ ike; aswoshi iya ̀pyi-òkpa iya. ¹⁷Nshio onye eche at̀uru ono, ad̀du iphe, ọ b̀ ono; mb̀ onye ono, agbaphujeru at̀uru ono! G'e gbukwaa ya ogu-echi l'ẹka; gbua ya ya l'ẹnya ẹkutara! G'ẹka iya l'ọp̄hu nwùhukotakwa; ẹnya ẹkutara iya apyah̀ rengurengu!”

Eemebyishi ọhogu Jierúsalemu

12 ¹Wakwa ozi, Chipfu ziru zidoru ndu Ízùrẹlu; mb̀ Chipfu, onye b̀ iya t̀saru akpaminigwe; tẹme ọ b̀ru iya t̀ru òkpa mgboko l'ọp̄hu; bya ab̀ru iya kuru unme ye nemadz̀ l'ẹhu. ²Ọ s̀ru: “Lekwa; mu e-mechaa mee ndu Jierúsalemu g'ẹp̄he d̀ g'okoro m̄e, ẹp̄he a-ngu t̀ko akpò garigari; mb̀ iphe, b̀kpoo ndu bukube p̄he ǹ. Ndu ono a-b̀ru ọhogu kep̄ee Jiuda yẹe Jierúsalemu mgburugburu. ³O -rwua mb̀ku ono b̄ mu e-me Jierúsalemu g'ọ b̀ru mkpuma, anyi oke ẹrwa d̀ru l'ip̄hu ndip̄he l'ọp̄hu. Ip̄he, b̀kpoo ndu meru g'ẹp̄he nwurib̄ru iya; e-meka onwop̄he ip̄he-ẹhuka. Teke ono b̄ ọhamoha, nọ lẹ mgboko l'ọp̄hu a-chi-kobe onwop̄he g'ẹp̄he tsoo ya ọgu. ⁴O -rwua mb̀ku ono b̄ inya-ọgu p̄he l'ọp̄hu b̄ mu e-yekota ebvu; mu emee g'ọbvu byakota ip̄he, b̀ ndu agba l'eli iya. Nokwa ip̄he, Chipfu eepfu. Obenu lẹ ndu Jiuda b̄ mu a-*no*du eletakpoo ẹnya òkpobe eleta. Mu emee g'inya, ndip̄he gude alẁ ọgu ts̀-*hukota* ishi. ⁵Noo teke ndu-ishi ndu Jiuda e-pfu l'ime obu p̄he s̀: ‘Ndu Jierúsalemu d̀kwa òkp̄ehu; kẹle Chipfu, b̀ Ọkalibe-Kakota-ike b̀ Chileke p̄he.’

⁶“O -rwua mb̀ku ono b̄ mu e-me ndu-ishi ndu Jiuda g'ẹp̄he kpo chii-chiichii g'ite-òku, e shiberu l'òku; ọzoo g'ẹka òku etsu ẹswa ereshi, e sweshiru esweshi. Ep̄he a-*no*du ekepyashi ndu nọ p̄he l'ẹkutara; m̄e ndu nọ p̄he l'ẹkicha; mb̀ ip̄he, b̀kpoo ndu nọ-pheru p̄he mgburugburu; obenu lẹ Jierúsalemu e-keerupho jingujingu l'alì iya l'ẹka o keru.

⁷“Chipfu e-vukpòdaru ̀zo dzòtaada ẹka ndu Jiuda b̀; k'ọp̄hu ùbv̀, aa-*no*du akwab̄e ọnu-ùlo Dévidi yẹe ndu bu lẹ Jierúsalemu ata akad̀ kẹ ndu Jiuda shii. ⁸O -rwua mb̀ku ono b̄ Chipfu e-gbobuta ndu bu lẹ Jierúsalemu; k'ọp̄hu b̀ l'onye kachaa arẁhu l'echilabò p̄he a-d̀ òkp̄ehu gẹ Dévidi; ndu ọnu-ùlo Dévidi edukwaǹ p̄he gẹ Ojozi kẹ Chipfu; gẹ Chileke

l'onwiya. ⁹O -rwua mbọku ono bu iphe, mu a-gbeshi ememe bu ge mu mebyishia ohamoha l'ophu, bu ndu etso Jierusalemu ogu.

¹⁰“Ozo bu le mu e-woru unme k'eze-iphe-oma; yele unme k'arwo arwo; wua l'onu-ulo Dévidi; mu awua ya lehu ndu bu le Jierusalemu. O bu ru mube onye ono, epe bvukashiru onya ono be epe a-nodu ele enya leka; teme epe araa ekwa mu g'onye ara ekwa nwa, bu iya nwa lanu; loorwua phe lehu shingushingu g'oorwuje onye ara ekwa nwa, bu okpara iya. ¹¹O -rwua mbọku ono be uzu-ekwa, aa-nodu atu le Jierusalemu a-pa aka apaa. Oo-duepho g'uzu-ekwa, a turu Hadadu-Rimonu le nsuda Megido. ¹²Mbu le-a; ndu ali ono a-gu aphu; ipfu nonu epe anokobe agu aphu onwophe; ipfu onu-ulo Dévidi epe l'unyomu phe; ipfu onu-ulo Nétanu epe l'unyomu phe; ¹³ipfu onu-ulo Lívayi epe l'unyomu phe; ipfu onu-ulo Shimeyi epe l'unyomu phe; ¹⁴mekpoo iphe, bukpo ipfu ono, phoduru nu ono lehu lehu epe l'unyomu phe unyomu phe.”

13 ¹“O -rwua mbọku ono be aa-su-furu onu-ulo Dévidi ogba-mini; epe l'iphe, bu ndu bu le Jierusalemu; gude iya safu phe iphe-aji phe; yee emerwu, epe merwuwaru onwophe. ²O -rwua mbọku ono be mu e-me g'e be kujehé obvu-agwota epha ekuku ophu l'ali-a; ophu a byadu anyatabaa ya anyata ophu. Nokwa iphe, Chipfu, bu Okalibe-Kakota-Ike eepfu. Ndu mpfuchiru epe l'unme, aturwuje nemadzu be mu a-tuko woshichaa g'o to duhe l'ali-a. ³Teke o bu lo duru onye suru le ya epfuchikwaduru Chileke; ne iya le nna iya, bu ndu nwuru iya nu asu iya-a: ‘O to dukwa iphe, e-me gi ti nwuhu; kele i dzuru uka su le Chipfu pfuru iphe, o pfuduru.’ Teke ono, o gude iya leka epe ono be nna iya ono; yee ne iya ono, nwuru iya nu ono a-nmagbu iya. ⁴O -rwua mbọku ono be iphere e-gudeje ndu mpfuchiru l'udu iphe, epe a-noduje ahuma. Ophu epe eyeedu uwe éjí éjí ono, epe gude edepushi ndiphe ono. ⁵Iphe, oo-nodu epe bu: ‘Mu ta abukwa onye mpfuchiru. Mu bukwa onye akopfu. O kwa iphe, e metaru l'ali be mu gude buru eshinu mu bu nwata.’ ⁶Teke o duru onye jiru iya su iya: ‘?Ichi iphe owa-a, tukokwanuru ngu ehu-a bukwanuru gunu?’ Lo su iya: ‘O kwa l'ibe onye mu l'iya eshi onya be e meru mu iphe ono.’”

**Iphe, e chiru onye eche aturu;
aturu iya gbakashihu**

⁷“Gube ogu-echi; tehu etehu; tsoo onye ono, echeru mu aturu ono ogu; o kwa onye ono, no mu ntse ono be mu suru gi tsoo ogu. Nokwa iphe, Chipfu, bu Okalibe-Kakota-Ike eepfu. Gbugbua onye eche aturu g'aturu agbakashihu. Mbèdua amachia aka buru ohogu ndu ophu ha nwanshii. ⁸Ee-woru ndu bu l'ali-a mgburugburu kee uzo eto; woru uzo labo gbushia; ole uzo lanu l'uzo eto ophuu a-phodukwa l'ime iya. O kwa Chipfu epe. ⁹O buru uzo lanu l'uzo eto ono be mu e-woru ye l'oku; mu abya

ahúcha phẹ ahúcha g'onye ahúcha mkpọla-ọchaa; bya ahúa phẹ ama; g'onye ahú mkpọla-ododo ama. Noo teke ẹphe e-ku ẹpha mu; mu aza phẹ ẹnu. Mu a-sù l'ẹphe bukwa ndibe mu; ẹphebedua asù lẹ Chipfu bukwa Chileke phe.”

Chipfu abyaakwaa aburu eze

14 ¹Lekwa! Mbọku kẹ Chipfu abyaakwaa, bu mbọku, aa-kwa iphe unu l'ọkwata nọdu l'echilabọ unu kee ya. ²Mbọku ono bẹ mu a-chikobe ọhamoha l'ophu chiru jeshia Jierúsalemú je g'ẹphe tsoo Jierúsalemú ọgu. Ẹphe alwúa lwúta mkpukpu ono; tuko iphemiphe, du l'ulo iya tutuchaa; pharwushia unwanyi phe k'okpẹhu. Le kee mkpukpu ono ẹbo; kpua nanu lẹ ndzu; ọle ndu ophu phoduru nu ta adukwanu onye akpufu phe lẹ mkpukpu ono. ³E -mechaa; Chipfu abya alufu je etsoo ọhamoha ono ọgu; egube ono, ọolwuje me ọgu nọdu ada ono. ⁴O -rwua mbọku ono bẹ oo-gude okpa iya pfuru l'eli úbvú olivu, du l'uzo ẹnyanwu-awawa kẹ Jierúsalemú. Úbvú olivu ono abya ebukahụ ẹbo; e -shi l'uzo ẹnyanwu-awawa jasú l'uzo ẹnyanwu-ariba. Echi iya aburu nsuda, a-ha ntumatu; kele úbvú ono ẹka lanu e-shi uzo isheli; ẹka lanu eshia ndohali. ⁵O buru nsuda úbvú mu ono bẹ unu e-tsoro gbalá; kele ogologo iya e-rwu Azelu. O buru udu oso, unu gbajeru teke ali nmajeru jijijiji teke Uzaya bu eze ndu Jiuda-a; noo udu oso, unu a-gba bu onoya. Noo teke Chipfu, bu Chileke mu a-bya; iphe, bukpuo ndu du nso g'ẹphe ha etsokwaru iya pho abya.

⁶Mbọku ono bẹ iphóró taa dudu; ophu oyi atsuđu. ⁷Eswe a-noduepho anwu eje. Mbọku tee nweedu eswe; ophu oo-nweedu ẹnyashi; kele nchi -jihuchakponu; iphóró adule-a. O buẹpho l'ọo Chipfu maru mbọku, ọo-buru.

⁸O -rwua mbọku ono bẹ mini, doru riasa; anu ndzu e-shi lẹ Jierúsalemú asoshi. Oo-ke ẹbo; ẹka lanu aso ala l'eze-ẹnyimu uzo ẹnyanwu-awawa; ophu aso ala l'eze-ẹnyimu uzo ẹnyanwu-ariba; l'ọ so l'udzumini aso l'onanwu. ⁹O buru Chipfu a-buru onye eze ndu mgboko l'ophu. O -rwua mbọku ono bu Chipfu lanu a-du; o buru ẹpha iya kpoloko bu ẹpha, aa-maru.

¹⁰Ali-a l'ophu; e -shikpo lẹ Geba jasú lẹ Rimonu, bu ndohali Jierúsalemú; a-dukota ge nsuda Araba. Obenu lẹ Jierúsalemú a-noduepho ephekerephe lẹka o no; e -shikpo l'oguzo Benjiaminu; je akpa lẹka oguzo mbu du; jasú l'oguzo mgbureku. Lo bya eshi lẹ Ulo-ephekerephe Hananelu noo jasú lẹka aapyishijeru onye eze akpuru vayinu. ¹¹Ee-bukotaru iya eburu. Ophu a byadu emebyishibaa ya ozo. Obenu l'ọ to dudu iphe, byakporu eme Jierúsalemú.

¹²Wakwa ẹjo iphe-ememe, Chipfu e-kpukposhi iphe, bukpuo ndiphe, tsoro Jierúsalemú ọgu. Ẹphe a-pfujeru apfuru; anu, no phe lẹhu ereshihu. Ẹnya phe echigaru l'onodu iya rehu erehu; teme ire anodu phe l'onu rehu.

¹³O -rwua mbòku ono bẹ Chipfu a-kpatsuje nemadzu ndzu-agugu. Onyenonu a-woje nwibe iya l'eka; ephe etsoaha nwibe phe ugu. ¹⁴Ndu Jiuda kwapho; a-nodu le Jierusalemu lwua ugu. Eku, ephe kparu; mbu ohamoha, bupheru phe mgburugburu bẹ aa-chikobekota; mbu le mkpola-ododo a-pa iya eka; yee mkpola-ochaa; yee ekwa, aanma anmanma.

¹⁵Egube ejo iphe-ememe ono, e kpukposhiru ndiphe ono bẹ ee-kpu-kposhikwapho inya; yee inya-mulu; yee inya-kamelu; yee nkafu-igara; mekpoo iphe, bu anu, no l'eka ephe kpoberu ulo-ekwa phe.

¹⁶Noo teke nwa ndu wafuru nu, shi l'ohamoha ono, shi etso Jierusalemu ugu ono; e-jeje Jierusalemu apha g'apha je abaru onye eze ono eja; mbu Chipfu, bu Okalibe-Kakota-Ike; ephe ejekwapho abo Obo-Mkpù. ¹⁷O-duru ndu bu le mgboko-a, ejeduru Jierusalemu je abaru onye eze ono eja; mbu Chipfu, bu Okalibe-Kakota-Ike; igwe tee dzeduru phe mini. ¹⁸O-buru l'ipfu ipfu ndu Ijiputu te ejeduru ayiru l'abaru iya eja ono; Chipfu ekpukposhikwa phe pho ejo iphe-ememe ono, o kpukposhiru ohamoha ono, ejeduru abo Obo-Mkpù ono. ¹⁹Ono a-buru aphu, aa-nu ndu Ijiputu yee aphu, aa-nu ohamoha, te ejeduru Jierusalemu je abo Obo-Mkpù ono.

²⁰O -rwua mbòku ono bẹ iphe, ee-deje l'okunmee, inya nya l'olu bu: "iphe, duru Chipfu nsò." Ozo bu l'ite, eeshi ite l'eze-ulo Chileke a-dujee-pho g'ochi, eegudeje ephe mee, aduje l'iphu oru-ngweja. ²¹Iphe, bukpoote, nokota le Jierusalemu me le Jiuda a-duru Chipfu, bu Okalibe-Kakota-Ike nsò. Temephe iphe, bukpoote ndu byaru egweru Chileke ngweja l'ahajeru wota ite ono gude shia anu ngweja. Ozo bu l'o -rwua mbòku ono bẹ ndu ngho taa duedu l'ulo Chipfu, bu Okalibe-Kakota-Ike.